


文潞公集


廿九之四十止



漢書門		一〇二〇七	類
三	函	三	架
四	冊	一	冊

內閣文庫		漢書
三	函	一〇二〇七
二	冊	四
三	架	三

內閣文庫		
番號	漢 10207	
冊數	4 (4)	
函號	315	93






文潞公文集卷第二十九

奏議

乞兵部廂軍密院置籍元祐二年

淺草文庫



臣以樞密院應內外廂禁軍自来並係密院置籍所
管今以新制並不管廂軍皆送尚書兵部且密院謂
之本兵之府豈可內外五十萬廂軍却無籍拘管緩
急出軍行助廂禁皆用况廂軍不獨用於諸般營造
雜役兼自来如廣南槍手綱丁及諸州鄉兵亦是密
院有籍欲乞令密院祇於兵部取索廂兵等人数於
兵籍房置簿拘管逐年揭帖常見實數亦不煩費緩

急差使易為照會即不妨尚書兵部依近制主管取
進止

奏戶部事 元祐二年

臣以戶部尚書乃昔之三司使之任掌邦計財賦出入無不同知則國用取濟今當以昔之三司使之任悉歸戶部財賦盈虛可以經制不誤大計自尚書侍郎以下慎選而久用之庶幾集事尚書侍郎即是三司使副之職郎中員外乃昔之判官之職此國之大計乞蚤留聖意

奏除改舊制 元祐二年

臣近面奉聖旨具自來除授官職次序一本進呈臣
今略具除改舊制節目如後

吏部尚書選人兩任親民有舉主陞通判通判兩任
滿有舉主陞知州軍此已上叙陞今謂之常調知州
軍有績効或有舉薦名實相副者特擢陞轉運使副
判官或提點刑獄府推判官今謂之出常調轉運使
有路分輕重遠近之差河北陝西河東三路為重路
歲滿多任三司副使或任江灌都大發運使發運使
任滿亦充三司副使成都路次三路任滿亦有充三
司副使或江灌發運使任滿充三司副使京東西灌

南又其次江南東西荆湖南北兩浙路又次之二廣
福建梓利夔路為遠小已上三等路分轉運使副任
滿或就移近上次等路分或歸任省府判官漸次擢
充三路重任以至三司副使內提點刑獄則不拘路
分輕重除授轉運使副省府判官或遂急籍才差知
大藩鎮者其歸亦多任三司副使或直除脩撰待制
者
三司副使歲滿即除待制有本官是前行郎中少卿
或除諫議大夫者有資淺而除集賢脩撰充都轉運
使後亦除待制

三院御史舊制多是兩任通判已上舉充歲滿多差
充省府判官或諸路轉運副使累遷至三路歲充三
司副使又歲滿除待制御史或言事稱職公論所推
即非次拔擢繫自特恩

正言司諫自來邊擢無定制或為帶館職文行者聞
或議論識體方正敢言朝廷所知臨時不次擢用本
無常法三館職事本育才待用之地例當在館久任
其間資地人品素高者除脩起居注即今起居過知
制誥有闕即試補即今中書舍人

已上並舊制甄別資品履歷次第除注之法與今來

官制或小異而大同更乞與三省恭詳進呈

奏夏國事

元祐二年

中外臣僚上言夏國受朝廷封冊恩禮極優錫賚尤厚而敢忘恩背惠輒行公牒傳達疆吏自絕于天不脩貢奉天地所不容人神所共怒乞行天討以正有罪欲乞降詔邊帥及出勅牒以論中外若朝廷姑務息民推天地之大德曲示含容抑群情之怒忿不與醜虜計較即乞明諭邊臣嚴加守備靜以待之必取全勝所有朝廷續遣大兵且令分屯次邊州軍以備緩急邊上句抽

進無逸圖

元祐二年

臣伏觀周公作無逸以戒成王後代聖君皆奉為至戒以成治化以克永世臣又觀唐史見宰相崔植對穆宗云玄宗初得姚崇宋璟為宰相二人者夙夜孜孜致君以道璟嘗手寫尚書無逸一篇為圖以獻玄宗置之內殿出入觀省記念在心每歎古人至言後代莫及故任賢戒欲心歸冲漠開元之末因無逸圖朽壞始以山水圖代之自後既無座右箴規又信姦臣用事天寶之末稍倦於勤王躬於斯缺矣今陛下虛心求治伏望以無逸為元龜穆宗善其對臣恭惟

皇帝陛下聰明稽古嚮學思□間月御邇英延儒臣講讀經史臣又觀邇英北壁有仁祖朝講官王洙所寫無逸圖臣慮禁中或未有此圖輒敢寫錄四軸并一卷上進望於殿內張掛置於几案以便聖覽臣愚不勝區區之至

奏吏戶刑部官久任

臣伏觀先朝復尚書省六部二十四司欲其分治職事悉如唐制臣竊以尚書省吏部典選戶部掌邦計刑部主國法此三部最為重而侍郎郎中員外多不久任遷轉頻數未熟本部職事已見遷改必致胥吏

乘隙作弊行遣迂滯臣欲乞三部郎中員外湏令並滿四年理為兩任逐任與陞資序立為定制經久遵行內吏部戶部司封司勳考功度支金倉部亦湏再任與逐任陞資上件三部郎官佐本部長官主判逐曹任官材掌邦計主國法皆是國之重事伏望聖慈詳察蚤賜施行

奏疎決刑獄元祐三年

臣今日蚤廷和殿奏為聖閱丙二十二日御殿疎決決禁繫罪人當日降雨尚□恐外處州縣有未雨足處乞下逐路監司令分巡部下州軍催促刑獄疾速

斷放免有寬滯因錄先朝御批劄子進呈奉聖旨令
進入

奏中外官久任事

臣以中外任官移替頻速在任不久有如驛舍無由
集事何以致治故累曾上言乞中外官各令久任須
滿資考近日以來遷改尤為頻數蓋由風俗躁競例
欲速遷執政者或避怒謗不能鎮靜欲望中外治安
未可期也臣欲今後凡差除中外官並具見在任官
年月滿未滿須令任滿方得交替如是急速籍才須
要其人則不拘此制其任滿得替之官須具在任實

有勞績方與照會合闕陞差遣所貴官吏自此不敢
苟簡欲速百職自然脩舉取進止

臣累曾上言以吏戶刑部官屬主大選大計刑
罰并外任監司及親民之官並須久任此繫朝
廷致治之本不可忽也今乞與三省更申明祖
宗舊法遵守施行

奏監司舉官事

元祐二年

臣竊見諸路監司及州郡帥守薦舉部下官吏但務
極稱才行不考實狀其間多拘告囑頗誤擢用臣乞
今後凡薦舉官並於舉狀內直具在任的確明白事

迹及本人素來行實為衆所稱方與上簿記錄或有
任用更加詳察取進止

奏坊監草地令百姓出租元祐三年

臣竊知太監寺在京院坊監牧馬草地其間甚有自
來水占牧馬不到去處係人戶斷撲租佃客貧民採
捕蒲魚種租蓮藕入城貨賣以資口食今聞太僕寺
為係牧馬地內一例勾收入官臣問得本寺官及供
到細狀稱上件水占牧地可以依舊令人斷課租佃
濟貧民並無妨闕況今來下民艱食之際伏望聖慈
特降指揮令舊出課租撲以紓近京貧下之民取聖

旨

奏鬼章事元祐三年

臣以謂始禽鬼章於法便當誅戮朝廷推天地大恩
貸其性命兼欲係其二子之心使感國恩不為邊患
則西邊事簡兵屯可減用度亦省今因阿里骨使人
既來若令一見鬼章即其子信其父在若更與補一
至下虛名使與李賒羅抹同日遊寺燒香寺庭之間
遙遠一見亦不能通傳言意即羅抹歸具言相見之
所則結曉捉等深信父在尤當感恩或謂鬼章有罪
之人難虛名小官亦不可授且如西賊李崇貴誘殺

保安知軍楊定其後秉常執送崇貴來先朝亦貸其命授以官李繼捧與繼遷叛與大兵討伐生擒繼捧來獻亦貸之授上將軍封宥罪侯此並是前朝推恩之例如此甚多若李賒羅抹到京數月不見鬼章歸番之後結呢捉等必切詢其父之所存却云並不曾見即結呢捉必疑其父亦被誅戮他日鬼章以病故其子亦必不信豈不深恨非時點集所部於熙蘭側近作過或堅求夏賊與之合縱分石秦鳳之界作過即西邊兵屯未可減用度未可省亦須稍煩西顧然臣以謂令李賒羅抹一見鬼章於朝廷有何損屈而

議者或堅謂不然即不知有何利害臣竊惑之愚昨目簾前臣具以此議止對亦屢聞德音以此為便後於都堂又集議却聞猶有遲疑未即奉詔者伏乞聖慈詳諸臣議蚤賜從長處分

如陪戎校尉之類乃九品武階又無請受向時多是諸州牙校授之結呢捉初亦知其父上京不戮又劉舜卿亦以委曲報結呢捉云鬼章見在東京照管甚厚今李賒羅抹歸番却云不見鬼章其子豈不疑恨即朝廷貸鬼章之命都無所濟

又

臣於二十七日上劄子言鬼章事必已付三省今晚
密院人吏來呈文字云候第二番阿里骨使人來令
見鬼章臣以謂終是令見鬼章何候後番兼第二番
使回又須更四五箇月若前番使回云不見鬼章必
是疑訝兼聞阿里骨第二番使人七月十日到闕欲
且令第一番使候第二番人來令起發因而同見鬼
章為便取進止

臣以謂議者不欲令見鬼章今又令候第二番
使人來令見之終是令見又何須如此疑難若

諸臣必有的切議論利害分明臣安敢不從

奏知州通判理任元祐三年

臣伏觀熙寧勅并元豐四年條貫內地知州通判知
縣並以三年為一任此正合舜典三載考績之義甚
為稽古之美法蓋親民之官久於其任則民安其政
故漢唐以來郡太守或有善政則增秩賜金留以久
任近觀元祐元年四月初旨知州通判並以三十箇
月為一任臣以謂三年為一任不為稽古之美法乃
先朝之定命施於官政極以為便此必是吏部以在
部守待知州通判待闕之官甚多少得近闕差注遂

欲促其年限殊不知雖時下差注得一番待闕之官
即替回者却多待闕者却衆徒有更張並不濟事又
非三載考績之義臣欲乞且遵用三年一任之法取
進止

若通判以三十箇月為一任即五年成兩任便
陞入知州則知州之闕轉多

文潞公文集卷第二十九

文潞公文集卷第三十

奏議

奏黃河事

臣竊見朝廷指揮都水監令於黃河沙堤第四鋪開
分水口分水入孫村口入故道以紓北流決溢壅溺
之患水官以開第四鋪口恐水勢東流水猛下流舊
堤久廢未甚完固且於第三鋪開口漸減水勢入孫
村口故□今開第三鋪口所減黃河水勢東行已甚
湍急乞速降指揮下太名府并恩州督貴上下官吏
日夕分頭赴河上照管橫隄順水隄金新隄及二股

河下面恩州地分隄防並湏完固勿令小有踈虞取
進止

奏賜儒行中庸篇并七條事

太宗淳化三年二月詔以新印儒行中庸篇賜中書
密院兩制三館御史中丞尚書丞郎給諫等人各一
軸注先是御試進士日以儒行篇為論題帝意欲激
勸士人敦脩儒行故特命雕印至是首賜新及第舉
人孫何等次及宰輔近臣臺閣臣僚并銓司選人聖
旨諭令依此脩身為治仍各於聽事所展掛終身遵
奉之真宗大中祥符二年十一月帝作文武七條其

文臣七條曰一曰清心謂平心待物不為喜怒愛憎
之所遷則廢事自正二曰奉公謂公直潔已則民自
畏服三曰脩德謂以德化人不必專尚威猛四曰責
實謂專求實效勿競虛譽五曰勤察謂勤察民情勿
使賦役不平刑罰不中六曰勸課謂勸課下民勤於
孝弟之行農桑之務七曰革弊謂求民疾苦而釐革
之以賜京朝官任轉運使提點刑獄知州府軍監通
判知縣者武臣七條一曰脩身謂脩飾其身士卒有
所法則二曰守職謂不越其職侵撓州縣民政三曰
公平謂均撫士卒無有徧四曰訓習謂教訓士卒勤

習武藝五曰簡閱謂閱觀士卒識其勤惰勇怯六曰
存恤謂安撫士卒甘苦皆同常使齊心無令失所七
曰威嚴謂制馭士卒無使犯禁以賜節度使以下至
刺史及諸司使以下任部署鈐轄知州軍縣監押駐
泊巡撫者又以禮記儒行篇賜親民釐務文臣其幕
職州縣官監務使臣仍並賜勅戒勵令崇文院刻板
摹印送閣門分給之初帝謂輔曰群臣上殿者朕各
以所職戒之漢制刺史以六條問事魏有五條晉有
五條武臣有諸葛亮七戒朕昨著辭思以勗勵諸臣
又先朝嘗賜近臣儒行篇可并以賜之八年利州路

轉運使臧奎諸令諸道州府軍監縣以所賜七條刻
石或書于公署之廳壁從之

臣伏觀先朝賜臣僚儒行中庸篇及文武臣七條所
以激勵士大夫脩飭行檢及中外臣僚謹奉官箴其
出外任者朝辭日各賜一本仍令閣門丁寧宣諭凡
在臣下靡不恭授而奉行慶曆中先朝以久罷賜七
條儒行中庸篇嘗降詔書申明然而後來臣僚久不
受賜無所警策至有士行不完進取無耻官守失職
苟簡無功臣欲乞舉行此法依例於朝辭日閣門給
賜及宣諭誠勵之臣愚以謂敦獎士類鎮靜風俗激

勸官吏治守忠廉斯乃為治之大本循致太平之道
故敢竭此區區仰于宸聽庶禋聖政伏乞付外施行
取進止

臣昔任河東路轉運使每巡按部下州縣守令
廳事屏風並無書寫七條雖間有刻石者亦無
幾又文字細暗難以朝夕披閱用為訓誡

進故事十門

元祐四年八月

臣伏以皇帝陛下聰明文思嚮學求治間日御邇英
接儒臣講經義順考古道聖德日新臣得陪侍講筵
實深慶幸今輒率愚筦之見於先朝所纂冊府元龜

中帝王門類內節錄十門分為十卷上進以備乙夜
之觀庶幾塵路之微粗禱聖德臣不任區區之誠

奏勤恤民隱事

臣於四月二十九日至西京見本京進奏官中狀錄
報皇帝太皇太后詔書以歷時災旱宿麥幾盡秋稼
未立上軼聖念引咎歸己特減常膳省以見聖心焦
勞得免湯罪已應天之義然臣尚在都下每見東西
使命詢其雨澤稼穡次第多云近已得雨苗稼滋茂
臣既出京到洛見緣路民田宿麥秋稼悉如聖詔所
及深慮向去小民艱食即聚為寇盜伏望嚴勅監司

覺察守令勤恤民隱勿致煩擾及督責巡檢縣尉屏
除賊盜令境內清肅人戶安居救荒之政各在疚心
諸事預防庶無後患

奏久旱乞不追擾事

元祐五年五月

臣聞化國之日舒以長蓋不奪民時不妨民力故曰
力有餘而歲收有望臣竊以自春以來特雨愆亢人
情惶惶謂必艱食至今月八日大雨霽霈庶民鼓舞
急於田事老幼就功力穡有秋正在今日臣慮州縣
親民之官不知農事之急以小小詞訟勾追證逮禁
繫淹延至於隨司門留亦皆拘繫頗妨農作臣欲乞

下諸路久旱郡縣當此農事急切之時民間小可詞
訟鬪爭一切且罷追擾除事干人命及劫賊急竊公
事即依常施行

奏西邊事

元祐六年八月

臣近得趙高書云金城疆界未定正緣新壘侵占稍
多虜情未易棄捨至今遷延若非朝廷堅守大信終
始羈縻必恐再開邊隙民力豈易堪邪臣又見高之
奏草云宥州累牒種蘭州等處將自來無人守把城
寨設計暗差人騎守把却稱是元豐年脩築乃是昏
賴之詞驗此南界邊官不欲夏國與朝廷通好况延

州是自来有事計會之所今又一向就利自黨比等
事情何處分雪若又一向固拒全不聽采夏國亦慮
難盡臣子之節今來賊意已窮無處分雪必恐
作過此隙一開邊吏邀功之人乘間盜利冒昨朝廷
恩彼誠自甘其心生靈何所負耶臣重惜朝廷頓累
年恩信一旦爭尺寸之利而失安邊之大計臣詳趙
高之奏甚切亦恐邊吏爭小利以邀功賞為國生事
臣伏覩二聖臨御以來威撫夷狄皆得其心邊境不
從中夏安寧今來夏國有此赴訴趙高又有奏陳臣
雖未知其詳伏望令三省熟計而審處之若事未明

白未能便夾定可否聞且令趙高徐報之如唐郭元
振之荅吐蕃論欽陵之請無直塞其來意且為計以
緩之使其惡意不得頓萌亦御戎之中策也臣又料
此賊計見朝廷以其恭順不疑其心自去冬今春以
邊儲有限直罷西邊戍兵數萬即謂邊備已解恐乘
此作過臣以謂不得不過慮也謹具奏聞

文潞公文集卷第三十一
臣伏以皇帝陛下間日御邇英閣令講官講尚書又
閣之南壁張孝經圖出入觀覽有以見陛下祖述堯
舜憲章文武以至德要道孝治天下臣今輒於尚書
諸篇中節錄十篇及孝經諸章中節錄六章進上以
備禁中清閒之暇研究義味或時令講官節錄疏義
進入上資聖德稽古求治之意臣伏讀尚書序云孔
子生於周末覩史籍之煩文懼覽之者不一遂乃討
論墳典斷自唐虞以下訖於周舉其宏綱撮其機要

文潞公文集卷第三十一

進尚書孝經解

臣伏以皇帝陛下間日御邇英閣令講官講尚書又
閣之南壁張孝經圖出入觀覽有以見陛下祖述堯
舜憲章文武以至德要道孝治天下臣今輒於尚書
諸篇中節錄十篇及孝經諸章中節錄六章進上以
備禁中清閒之暇研究義味或時令講官節錄疏義
進入上資聖德稽古求治之意臣伏讀尚書序云孔
子生於周末覩史籍之煩文懼覽之者不一遂乃討
論墳典斷自唐虞以下訖於周舉其宏綱撮其機要

典謨訓誥之文凡百篇所以恢宏至道示人生以軌
範也帝王之制坦然明白以其上古之書謂之尚書
然則後代聖帝明王莫不祖述寶為大訓恭以皇帝
陛下聰明文思稽考古道日御邇英延訪經義方命
講官講解尚書孜孜不倦所以聖德日新比隆堯舜
臣以叨侍經筵輒於尚書三十二篇采其切於資益
聖治宜於重複溫故者凡十篇錄進篇別有後序所
以發明本篇之大旨所冀便於乙夜之觀

堯典

堯之聖德蕩蕩難名而此篇極簡要亦仲尼舉宏綱

撮要之理如篇之所載者克明峻德以親九族平章
百姓協和萬邦分命羲和典掌四時使民務農利用
厚生允釐百工庶績咸熙斯皆後世聖帝明王所宜
祖述而模範之臨文而三復之故摘其目以叙之

舜典

虞舜之德重華協帝故列于二典後世作者雖三王
之盛不可及已篇之所載命禹作司空而下至于四
岳十二牧官得其人庶績咸治流放共工驩兜竄三
苗殛鯀四凶人而天下咸服故曰舜有大功二十茲
所以重華協帝

大禹謨

禹稷臯陶共事舜帝君臣同寅咸有一德故矢厥謨成厥功曰兪曰都乃君唱臣和之美其謨則有后克艱厥后臣克艱厥臣罔遊于逸罔淫于樂任賢勿貳去邪勿疑罔咈百姓以從己欲斯皆上下交儆以成聖功舜禹之所以為聖帝明王以此

臯陶

臯陶曰允迪厥德謨明弼諧禹曰兪如何臯陶曰都慎厥身脩思永禹拜昌言曰兪臯陶曰在知人在安民知人則哲能官人安民則惠黎民懷之臣以舜禹

之時君臣謨議之恊恭後王所宜為法

益稷

此篇所載禹戒舜曰慎乃在位帝曰兪然禹言禹曰安汝止惟幾惟康帝曰吁臣哉鄰哉鄰哉臣哉禹曰兪帝庸作歌曰元首明哉股肱良哉庶事康哉又歌曰元首叢脞哉股肱惰哉萬事墮哉帝拜曰兪臣謂斯言可為深戒

伊訓

篇云嗚呼先王肇脩人紀從諫弗咈先民時若居上克明為下克忠惟上帝不常作善降之百祥作不善

降之百殃臣以尹之斯言愛其君忠於國可謂至矣
有臣如此時君固當尊禮其人信受其訓

洪範

天地之大法其類有九而敬用五事曰貌言視聽思
茲乃人君尤當慎思之蓋人君言動則左右史書之
為法不可不慎也故臣以此篇五事為重
此篇周公以戒成王曰君子知其無逸先知稼穡之
艱難文王不敢盤于遊田以庶邦惟正之供自今嗣
王其無淫于觀于逸于遊于田故成王服其訓戒乃

為令王至唐開元中作無逸圖置於禁中出入省覽
以為龜鑑臣亦嘗錄此篇為圖以進以助聖覽伏望
曲留睿意

立政

周公告于成王曰王左右常伯常任準人自今立政
其勿以檢人其惟吉士蓋有天下國家所切者任人
得賢則治非賢則亂

周官

王曰若昔大猷制治于未亂保邦于永危唐虞稽古
建官惟百夏商官備亦克用又明王立政不惟其官

惟其人又戒庶官欽乃攸司慎乃出令以公滅私民
具允懷推賢讓能庶官乃和不和政靡舉能其官惟
爾之能稱匪其人惟爾不任成王稽古建官為治之
本後之帝王所宜詳慎

奏孝經圖事

臣以官忝師保得侍邇英伏觀閣中有仁祖命學士
蔡襄所書孝經圖張於南壁以便觀覽有以見仁祖
孝德在躬推廣以及天下恭以皇帝陛下天資聖德
行在孝經嘗聞令講官備錄經義進於禁中臣伏望
陛下日省而特思之

又進尚書二典義劄子

臣伏觀尚書序曰仲尼討論墳典斷自唐虞以下訖
於周所以克舜二典為書之首篇垂世立教示人主
以軌範帝王之制坦然明白可舉而行克舜二典並
云曰若稽古帝克帝舜以謂二帝並能順考古道而
行之乃知人主之聖必由稽古恭惟皇帝陛下日御
經筵集講官說尚書蓋聰明文思稽考古道垂意於
安天下之安天下幸甚臣以衰殘忝位保傳得侍經
閣為幸已深又不自揆輒於二典之中采掇事義教
條兼以訓傳或理有切近治體亦以愚短之議附之

庶幾粗有所補夫以齊之霸國而孟軻陳堯舜之道於齊主之前欲勉進之今臣遭堯舜之時陳堯舜之道固其宜矣臣愚不勝區區之誠謹錄以上進

堯典

堯典曰乃命羲和欽若昊天敬授人時羲和氏世掌四時之官臣某曰王者尊居億兆之上所敬而畏者惟天為大故欽順之乃命官分職恭授民時分命羲仲宅嵎夷曰暘谷平秩東作宅居也東表之地稱嵎夷暘明也日出於谷而天下明羲仲居東方之官平均次序東作之事以務也申命羲叔宅南交申重

也言夏與春交治南方之官所居平秩南訛至敬訛化平叙南方化育之事敬行其教分命和仲宅西曰昧谷平秩西成昧冥也日入於谷而天下冥故曰昧谷居治西方之官掌秋之政萬物收成故平序之以助成物申命和叔宅朔方平在朔易在察也比稱朔易謂歲改易於北方平均在察其政以順天常

臣某曰帝堯上以敬順天命下以恭授人時使此羲和氏之四人各居其方以布四時之令春序其農疇興作之功夏致其生物化育之事秋秩其百穀成收之宜冬察其一歲豐儉之實吏

久於職官脩其方民變時雍庶績咸治帝乃命
舜歷試諸難

舜典

舜典曰欽哉欽哉惟刑之恤哉舜陳典刑之義勸天下使欲之敬之流共工于幽州象沓滔天足以惑世故流放之放驩兜于崇山黨於共工罪惡同竄三苗于三危三苗國名為諸侯號饕餮貪也殛鯀于羽山方命圯族績用不成殛竄放流皆誅也四罪而天下咸服舜曰咨四岳有能奮庸熙帝之載奮起庸功載事也訪於群臣有能發其庸功廣克之事者使宅百

揆亮采惠疇亮未惠順也求其人使居百揆信立其功順其事者誰乎僉曰伯禹作司空僉皆也帝曰俞咨禹汝平水土惟時懋哉俞然也帝曰棄黎民阻飢汝后稷播時百穀衆人之難在於飢汝后稷播是百穀以濟之帝曰契百姓不親五品不遜五品謂五常遜順也汝作司徒敬敷五教在寬布五常之教帝曰皋陶蠻夷猾夏寇賊姦宄猾亂也夏華夏也攻劫曰寇殺人曰賊在外曰姦在內曰宄汝作士五刑有服士理官也五刑墨劓剕宮大辟服從也言得輕重之中正帝曰疇若予工僉曰垂哉帝曰俞咨垂爾作共

上帝曰疇若予上下草木鳥獸僉曰益哉帝曰俞咨
益汝作朕虞虞掌山澤之官帝曰咨四岳有能典朕
三禮僉曰伯夷三禮天地人之禮也帝曰汝作秩宗
主郊廟之官帝曰夔命汝典樂教胄子胄長也謂元
子以下至卿大夫子弟以歌誦之舞之教長國子中
和祗庸孝帝曰龍朕墜讒說殄行震驚朕師聖疾殄
絕震動也言我疾讒說絕君子之行驚動我衆汝作
納言出納朕命惟允納言喉舌之官聽下言納於上
受上言宣於下必以信帝曰咨汝二十有二人禹契
蓋伯夷夔龍六人并四岳十二枚凡二十二人欽哉

惟時亮天工各敬其職惟是乃能信立天下之功三
載考績三考黜陟幽明三年有成可以考功九載則
能否幽明有別黜退其幽者升進其明也庶績咸熙
考績發明衆功皆廣

臣某曰舜既紹堯熙帝之載以請治天下者必
先任人人有善惡必須審知故曰在知人在安
民故曰知人則哲安民則惠黎民懷之苟不知
人則賢愚善惡混淆不分蓋善惡不可並用惡
人道長則善人道消當須屏去姦惡可以登用
善良故其始也先去四凶而天下服然後咨詢

岳牧而用禹稷臯夔而下二十有二人天下大
治又命龍作納言戒勅之曰朕歷讒說殄行震
驚朕師汝作納言夙夜出納朕命惟允讒邪之
人專在譖毀善良舜深疾之納言喉舌之官出
納王命必在忠信故舜受命而切戒之隋唐以
來納言之名不改隸門下省至於本朝頗循唐
制以侍中為門下省官長侍郎為貳並為執政
官所選益重必協僉論又曰三載考績三考黜
陟幽明古之任官必在於久久則有功可以考
其績効故先朝之法省寺監官並以三年為任

循古之美法也義當遵守如其籍才不次任用
則難拘常制臣學述荒淺不足以發明但以狂
言聖擇莫有少補

文潞公文集卷第三十二

陳乞

乞罷男機宜

臣男宣德郎守太子右贊善大夫管勾永興軍一路
安撫使司機宜文字恭祖昨以臣被詔赴闕將帶隨
行結絕本司文字今並已了畢欲乞依例隨本使罷
任朝見歸班取進止

臣男恭祖慶曆中自鳳翔府簽判罷任赴闕臣
方在政府首尾五年並不令就差遣今來忝陞
朝籍須逐日赴朝參與百官同幕次恐涉謗議

只欲令於審官院依例就一合入遠闕庶免逐日與超朝官相接合具奏知

乞差使臣

臣隨行合差指使三員臣昨丁母憂已發遣使臣兩員歸班今却差侍禁葛宗望殿直呂世良充隨行指使所有逐人各係合入親民差使欲乞各理為親民差使取進止

其葛宗望呂世良並係免短使合入親民差遣

人數乞依例各支與大添支請受

乞張熙恩澤

臣昨丁母憂河南府差教練使張熙管勾墳塋葬事首尾二年有餘幹事得力欲望朝廷量賜恩澤於本人牙職上遷補一資取進止

乞郭宣恩澤

臣有隨行教練使郭宣隨臣勾當近二十年有行止得力今者因臣忝恩移鎮欲望朝廷改補一三司大將名目且在臣處驅使取進止

乞門客張度恩澤

臣有門客教授張度累舉進士南省下第先於皇祐五年以臣奏薦蒙恩授試將作監主簿不理選限自

後本人又曾錄應省下令來萬係先朝皇祐二年明
堂已前到省舉人合該免解欲望聖慈念其久歷科
場家貧親老未霑寸祿乞補一三班差使名目量與
減年轉補借職取進止

請假劄子

臣昨暫請服藥假兩日伏聞持降中使就臣私第傳
宣撫問臣已於今月二十六日早赴樞密院管勾本
職公事訖謹具奏聞謹奏

已具狀附傳宣中使奏謝去訖

謝男貽慶授文資及章服表

元祐
元年

臣某言伏蒙聖恩除臣男供備庫副使兼通事舍人
同勾當軍頭引見司貽慶克奉議郎守尚書都官員
外郎并賜緋魚袋者仍覩告詞謂老臣弼亮三世粗
有微勤以愚息乞拔文資特推寵命舉族知幸受恩
若驚臣誠榮誠感頓首頓首切以朱紱身章文昌郎
位皆為殊選悉昇非材仰戴丘山如臨淵谷此蓋伏
遇陛下深仁育物道廣納荒既不棄於菲葑亦兼錄
於闕闕致茲蒙陋過有忝塵敢不嚴以教忠勤於從
政力著治微之効仰酬覆燾之私臣無任

陳乞堂第大同西京差遣

臣先准勅於西京立家廟四室臣多在闕下守官或
外守方面則西京常有子弟三兩人在彼守官以奉
家廟四仲祭祀今以臣諸子並丁母憂解官持服並
無子弟在西京守官奉祀今有臣親堂弟朝請郎大
同近因相州簽判得替欲望聖慈乞差充西京一合
入差遣所貴家廟歲時得人奉祀取進止

奏程珣葬事

臣切聞太中大夫致仕程珣身亡珣素履清介守分
安貧久歷外任皆有聲稱身沒之後家事索然只有
一子程頤素蘊學行見推士林向為通英講官因緣

經義問陳治體上負聖政今其父之亡窘於襄事伏
望聖慈特賜矜憫優與賻恤以周其急伏候進止

奏孫男扶掖

臣有長孫男右通直郎永世自來每遇臣入殿扶掖
近蒙恩除權發遣提舉三門白波輦運公事奉聖旨
令候扶掖了日朝辭今來本任闕官日久春運是時
及已差官管押牌印到京多日臣近有以次孫承事
郎康世自西京來迎接臣到京欲乞令康世暫權扶
掖替承世交割管勾赴任取進止

奏富相公薨乞與免納馬價錢

元豐六年十一月

臣勘會武寧軍節度使行尚書左僕射同中書門下
平章事鄭國公富集於今年閏六月二十二日因患
身薨所有前後未納馬價錢見蒙省符催理今未任
罷請受無可尅納謹具劄子奏聞伏望聖慈下有司
依例特賜除放謹奏

文潞公文集卷第三十二

文潞公文集卷第三十三

乞罷重任

御書批荅

皇祐元年

卿近進乞解罷重任為遷葬事於私實便於公似有
所妨今正使卿當其國政推誠委用君臣同體所求
難從所便更不消再上封章乞退所請宜不允付文
某
臣伏蒙聖慈以臣上表乞解重任求領近郡特降宸
翰封還臣章諭令勿再上者君父之命理當必從臣

第一劄子

熙寧二年

子之志亦有所守臣蒙被厚恩忝塵近位豈欲輕
軒幄自取踈外誠以年事衰晚精力減耗不能則止
湏合自陳若覩然尸祿必當壞官析解樞衡願假符
守庶寬職責稍息疲瘵惟陛下天地父母哀而憐之
必賜開可無任

臣以非才久塵重任衰老疲蕭力不勝任惟極至誠
上干宸造必祈矜憫俯賜俞從雖更多言無易此懇
豈敢喋喋徒煩聖德切見知河陽陳述古到任已久
臣雖愚短願假符守猶冀勉驚粗寬西顧臣無任

勤詩區區所懷隕越無措臣愚尚冀天慈垂憫必從
所欲假以外補稍寬疲蕭情迫於中言無倫次臣不
任惶恐候命之至謹具奏聞伏候進止

又熙寧
四年

臣伏蒙聖慈封還臣所奏劄子以臣陳乞外補未臨
俞從仰味聖言伏增感懼切以犬馬之微猶知悉主
况臣奉事尤右行將五年至仁涵容厚禮優假豈當
輕去軒幄自取踈外直以衰老疲劣勉強不前履餽
是虞獲水加慄然每欲陳情必深愧畏內惟悃悞終
冀矜從伏惟陛下天地大恩日月委照俯從所欲俾

守外藩勉其寸長尚可圖報臣無任

又熙寧五年

臣內訟非才久塵大任已瀝誠懇仰叩高明祈解樞機之近司并還將相之兩綬得以散秩假守便州必冀聖慈俯從人欲重念臣齒髮衰殘精力減耗不能則止自知甚明當退一也久妨賢路無補聖政當退二也賦性孤拙與時多迂當退三也所當退者三而晏然尸位陛下聖明以臣為如何人天下清議以臣為不知止臣雖昏蠢粗有肺肝夙夜以思不皇啓處恭惟天地至慈不使一物失所伏望函發俞旨俯遂

勤請臣無任

臣聞慈父不能愛無益之子仁君不能畜無用之臣如臣不才可謂無用臣自叨樞院首尾八年訖無猷為上贊述作官忝空土任居論道而無一論可裨聖政職兼常伯責在納言而無一言可回天聽加之衰朽淺以耗昏尸祿若斯覲顏至甚是敢傾懇悃荐拜封章祈解樞機之近司并還將相之劇任得以散秩假守使州庶道人言逸妨賢路伏望陛下憐其舊物貸以寬恩未責曠官亟從所欲臣無任

又
臣伏蒙聖慈以臣乞解重任未賜俞可特降中使封
還臣所上劄子并傳宣撫諭已具奏謝切今臣年齒
衰殘難任樞務累年以來頻乞出補閑郡聖慈全度
終未允從今以西事向寧及密院忝除副使臣方敢
再申前請必望聖慈俯從所欲臣無任

又
臣以累具奏封乞解重任私居候命未奉俞音荐從
聖聽臣自前日入見陟降俯伏及歸私第左膝轉加
腫痛欲望聖慈許臣在假五七日將息稍得平愈即

當入見伏候進止

又

臣以衰老不才久玷樞院比年以來奏章數十上祈
解重任乞從外補聖恩存錄未賜允俞蓋犬馬微誠
不能上勤天聽日勉一日于茲八年精神內竭筋力
外耗今以邊事寧息力伸前請必冀聖慈俯遂人欲
臣復內訟才拙望輕精明不能洞機微重厚不能鎮
浮薄於國之謀固多踈闊為臣之義自當退黜伏望
聖慈憫憐舊物尚假寬矜終賜保全早從所欲臣不
任

又

臣累乞外郡直以衰老無補勉強所難惟望聖慈矜貸許其均勞累蒙敷諭令赴朝供職雖出對天光口陳誠懇陛下必加存眷未容解去臣子之情仰荷宸意難以味味固辭須至不避嚴誅有違聖旨俯伏私居必具得請臣無任

臣辭窮意切伏望聖慈早賜矜可

又

臣惶恐臣之至誠危懇備瀝於累章而天聽蓋高未賜俞允仍俾亟復其位未即奉詔伏深惶懼嚴誅重

謹所不敢逃然臣所恃者聖仁如天必加矜察是以不避再三之瀆猶敢控陳伏望憫臣久勞精力耗竭許從外補以保衰年臣無任

又

臣累具奏章乞外補未蒙俞可及連遣中使撫諭亟令供職愚誠懇切久不奉詔以是自訟俯伏待罪然猶仰恃聖慈必從所請臣無任

又

臣伏蒙聖慈特降中使封還臣乞外補并待罪劄子及傳宣撫諭已別具狀奏謝切念臣止緣衰老無堪

久妨賢路連章累奏罄竭懇誠必望聖慈特賜矜允
仍乞於冬至節假前蚤賜處分臣無任

又

臣上章乞守外郡私居俟命于茲累詢今冬節假開
伏望聖慈矜允蚤賜處分

又

昨晚蒙降中使撫諭及封還臣所上劄子至夜即聞
鑾學士院必謂已降指揮遂臣所請今即知是降德
音於河隴臣今不避譴責私居得罪須至再有陳請
伏望聖慈矜允

又

臣以齒髮衰殘精力減耗數年以來累乞解罷重任
出守近郡聖慈念舊未忍遐棄愚衷雖切天意未從
去冬伏蒙聖恩矜其疲薻許至今年同天節復聽從
外補德音親被睿旨丁寧復云不須上表即便踐言
臣今更不敢別上章表仰瀆天聽伏望聖慈特申前
命錄臣向時累奏許解重任假守近郡臣無任

又

臣伏蒙聖恩特降中使賜臣詔書以臣乞解重任外
補近郡未賜俞允尋具狀奏謝伏念臣年齒衰殘精

力減耗內省尸素日虞曠敗數年以來懇求外補庶免妨賢面聖度含容未即遐棄緣去冬懇請蒙聖慈憫勞俟至今年同天節後聽解重任許從外補且云不須上表便可舉行臣方敢再瀆天聰必期得請臣竊謂天子固無戲言王者必信出令伏望聖慈憫臣衰疲允臣勤請臣無任

又

臣以去冬親被德音許至今年同天節後聽解重柄出補近郡仍云不須更上章表便可舉行定命臣所以祇具劄子自陳必謂便降俞旨今乃申遣中使特

賜答詔加以敦諭亟令復位即率誠願深積兢惶須至別具表章再瀆宸聽庶期矜察允從仍乞只據臣今所上一表早賜處分臣無任

又

臣丹誠至懇已罄竭於累奏更無可陳述惟仰告天慈憫其衰老許其外補聖言可復人欲是從臣無任

又

臣昨日隨表上手劄子再瀆天慈蓋臣之丹誠至懇已窮極而露更無可陳惟仰告聖慈天地父母哀而憐之俯察危衷許從外補臣無任

被命音今茲邊事既寧老臣必期得請祈天俟命願
賜哀憐臣不任

文潞公文集卷第三十三

文潞公文集卷第三十四
乞致仕

劄子

臣以年齒衰老數年之間累上章奏乞致官政聖慈
存念舊物未賜俞允今春以來尤加昏耗伏望矜其
疲瘵聽還印綬俾歸田里以保餘年臣無任

今年二月中蒙聖恩差入內供奉官馮景賜臣
詔書不允所乞及不令更上文字臣尋附馮景
口陳誠懇候過同天節獻祝聖壽以表臣子之
誠即當更上奏章乞致政不審馮景曾敢奏否

又
臣累乞致仕未蒙允從披露懇誠罄竭辭語惟望聖
慈矜允聽還印綬許歸田閭臣無任

又

臣於五月二十四日再上章及具手劄子陳乞致仕
臣至中夏以來頻傷炎暑時若腹疾伏望聖慈憫其
羸老聽還印綬許歸田閭天地大恩於臣至幸臣無
任

又

臣累乞致仕未被俞音既緣迫切之誠難避再三之

瀆今輒繼陳章奏數冒天聽庶臣自夏以來暑氣所
侵腹疾時作雖欲勉強實難支持伏望聖慈俯詳累
奏蚤賜矜從聽歸田里臣無任

又

臣以未遂致仕之請乞納使相印綬求領官觀伏望
聖慈憫臣衰老蚤賜指揮所冀三伏已前赴洛免冒
盛暑以保疲羸臣無任

又

臣犬馬之年七十有五久當致政而章數十上未被
俞音迫於激切之誠須至再三之瀆臣今乞還使相

印綬求領宮觀職名所冀殘年稍遂休息况有成例
伏望矜從臣無任

又

臣累上表章陳乞致仕伏蒙聖慈屢降詔旨曲加敦
諭未賜俞從仍俾斷章不令復請臣今祇服丁寧之
訓勉從夙夜之勞即欲繼上封章實恐頻致煩瀆然
臣桑榆景晚犬馬力殫未遂掛冠深虞履餗仰初宸
造俯察愚衷俾諧休退而歸庶全終始之節臣無任

又

臣累乞致仕未蒙俞可念臣桑榆景晚犬馬力殫德

薄位高任隆責重非惟忝據已久寔亦勉強難任不
避嚴誅仰宸造伏望聖慈憫臣羸老聽還印綬許
歸田廬臣今不敢以重複繁詞別具章表深恐頻煩
聖覽止於直布危懇手陳至意所冀易聞天聽蚤遂
俞音臣無任

又

臣伏蒙聖慈以臣累上奏章陳乞休退特差中使傳
宣撫諭矜臣羸老察臣懇誠申以季秋之期當可露
章之請此蓋陛下仁深化育道廣生成必以當盛夏
炎燠之時非老者行役之際俾及秋杪使遂首塗上

戴鴻恩感極以泣臣以附表奏謝別具劄子布區區
犬馬之誠臣無任

又

臣伏蒙聖慈特遣中使賜詔書丁寧撫諭以臣頻年
上章累求致仕前後敦諭已極重複都不體諒者臣
仰被宸旨俯積兢惶深味聖言復增感涕緣臣年衰
位重已極滿盈福過災生日虞顛覆是以頻有干瀆
懇祈退閑今蒙恩旨令臣少為逡巡且停來奏俟將
來郊祀禮成當有處分重言如天炳若星日臣之所
請休致今則有期更不敢繼上奏章味煩瀆甫過嚴

禮恭俟俞旨臣無任

劉御藥回附口奏

聖旨以某頻上章求致仕前後敦諭已極重複都不
體諒者始初聞命深積兢惶然深味聖旨復增感涕
蓋某年衰位重深懼滿盈之災遂致頻有干冒今蒙
聖旨令某少為逡巡且停來奏俟過郊禮當有處分
則某所請休致今遂有期更不敢繼上章煩瀆才過
郊禮恭俟俞旨

隨表劄子

臣元豐中犬馬之年七十八先帝憫其疲老詐以退

休伏自皇帝陛下太皇太后陛下臨政起臣於林下
追赴闕庭仍俾平章重事昏耄非才固辭不獲今已
三年有餘力所不支深慙尸素頻年請退竟未許從
臣今年事比元豐中又益老耄加之多病伏望聖慈
意許從懇迫之誠遂其退歸之志

又

臣以年過耄耄已具表并劄子懇祈休退茲者必望
聖慈矜從臣以羸瘠自京至洛六驛難以乘坐擔子
遠行切欲及此洛汴未凍間乘舟至洛稍得安穩伏
兪旨便可促裝臣無任懇切祈天俟命之至

又

臣近上章并累上劄子懇乞伏蒙聖恩頻賜詔書敦
諭未亮至誠緣臣年將九十固難任職但爵齒之高
謂可表率多士而又德薄望輕不能鎮重風俗以此
自度乃知素飭豈宜久處然臣之至懇切在乞身而
歸得遂正丘之志其幸甚矣伏望聖慈憫憐其誠早
賜兪旨

又

臣近累上表章劄子請休致已竭精誠惟望聖慈矜
憫早賜兪從令臣得於洛汴未凍已前乘舟而歸使

疲老免陸行之勞臣本欲入對軒陛口陳至懇又以
股臑未寧未敢趣朝俟得請勉力入謝臣無任

又

蒙降批荅不允仍斷來章臣以詞情懇切累上奏章
誠知煩瀆之過然臣衰疲不能任事惟望聖慈深賜
軫憐必從其請遂其退閑臣無任

又

元祐元
年二月

臣懇迫之誠已具累章上瀆宸聽念臣爵祿年齒皆
極盈滿以致災患嬰疾未平伏望聖慈特垂哀察仍
乞不俟批荅臣所上累表便賜俞旨蚤得去位庶免

疾顛以全衰朽臣不勝激切俟命之至取進止

又

臣歷觀前代輔相之臣動德重望為時倚賴者及其
老或病乞身以退時君憫勞矜老多遂其請所以全
人臣進退之禮敦君父始終之恩如唐之房杜姚宋
裴度輩可謂賢相時之倚重而宋璟裴度以老疾求
退皆遂其請且云成人君養老之恩臣以非才不敢
比於前賢徒以遭逢聖世忝竊過分又其年過老耄
必望聖慈矜憫許其退歸臣無任

又
元祐
二年

臣自去年秋冬及今年夏秋以年老疲繭累上章乞
退未蒙允許乞候興龍節後必望矜從今已經聖節
上壽禮成伏望聖慈察臣懇誠許臣乞骸歸老臣不
敢別具表章慮煩瀆天聽伏乞蚤賜矜允臣無任

又

臣以衰老不任職事不避煩煩聖聽今蚤已入劄子
乞退歸丘園臣之情誠極於迫切緣桑榆之景垂盡
鐘漏之期不永安能任重致遠惟望聖慈憫其疲繭
乞與骸骨使遂首丘之望臣於私第日俟俞音臣無
任

又

臣以衰殘久爾尸素貢誠懇乞歸林泉私居俟命未
被俞音諸司以奉旨不接臣文字須至乞對口陳至
誠必望聖慈濟發德音亟從所請臣無任

又
元祐二年

臣以衰老連年懇求休退近上劄子乞歸蒙聖恩賜
詔未獲俞從愚誠迫切啓處不遑念臣新年八十三
歲桑榆晚景固無幾何勉強疲瘁誠難支久臣切以
度之裴度一代宗工夷夏具瞻年未七十曾平章重
事尚止留京師裁及百日遂得請而退如臣之虛薄

忝冒聖恩至優極厚伏望太皇太后陛下皇帝陛下
察臣危懇許賜退歸臣無任

又

臣伏蒙聖恩賜詔敦諭以御戎之策未有定議京東
西河朔荐飢切在圖議臣切以太皇太后陛下臨御
以來德澤霑洽人心歡泰廟堂哲輔皆陛下高選訐
謀獻納萬務畢舉而老臣昏拙廁於其間一無裨補
但勉強疲駑焉能支久伏望太皇太后陛下天地父
母哀而憐之乞與殘體俾從休退且暮之人豈復望
丘園之樂臣無任

又

元祐四年十
二月十八日

臣戴瀝危誠上干震聽伏念臣自熙寧元豐間累乞
休致前後凡八九年蒙先帝哀憐許以謝事退歸林
下曾未三歲伏遇皇帝陛下太皇太后臨御之始起
自田里已逾八十累蒙詔旨甚嚴敦迫上道俾之平
章重事弗獲固辭迨今四年尸素已甚矣自被命而
來繼乞退歸前後章數十上未蒙矜允而臣年益篤
老智力皆殫念終無補報萬一加之連年多病昏耄
弗支近者兩上封章七具劄子再乞致仕天聽未回
仍不許收接文字區區愚衷無以自達俛俛逾月復

過興龍誕節幸遂稱觸常諧得謝之期懇迫之情翰
竭已盡臣今更不敢別具表章上瀆而况陛下眷留
老臣前後恩禮已極亦不敢更煩照諭伏望聖慈哀
憫亟降俞音許遂退休激切之誠旦夕俟命

今年過明堂大禮累陳乞休退未蒙矜可尋奏
乞候過興龍節上壽伏望聖慈矜憫疲瘁早令

休退

又十二月十八日
手劄子將上

臣昨過明堂大禮陳乞休致未蒙矜可尋乞候過興
龍節上壽今已具劄子奏上伏望聖慈必賜允從

又十二月十九日

臣已具劄子奏乞解罷重任復致官政具述四年之
間章數十上誠懇殫竭年過耄耄力難勉強兼蒙聖
恩眷留前後禮意備至更不敢別具表章只乞亟降
俞旨臣昨日入對面告聖慈激切之誠控陳已盡義
無可留必望哀憐老臣曲垂矜允聽遂乞身之請俾
全始終之恩臣見今居家日夕俟命伏乞蚤賜處分
期於得請乃已伏望皇帝太皇太后陛下天地父母
哀而憐之亟發德音特垂矜允臣無任

又十二月二日

臣已四具劄子陳乞致仕誠懇罄竭得請是期臣見
今家居俟命日夕以覲仰惟聖慈必諒哀懇伏乞早
賜俞旨臣無任

又十二月二十三日

臣近者累具懇誠再申前請乞解重任復遂退休并
嘗入對仰叨聖慈罄陳悃悃伏蒙皇帝太皇太后察
其至誠憫其篤老特降詔書俯垂矜允仰荷終始保
全之賜實踰天地父母之恩奉誠諭言不勝感涕臣
前具奏聞俟至後月汴洛水善乘舟西歸今已恭依
詔旨少留至二月上旬啓行欲望聖慈速賜降制處

分臣今家居日夕俟命下入謝以叙感恩荷戴之誠
臣授命之後告謝正謝禮畢尚當數次入對方
敢朝辭以盡犬馬戀主之誠兼正月做日甚多
比謝辭禮畢已及春和伏望且夕先降制命

又二月初五日

臣以羸老累乞退休伏蒙聖慈哀憐特降詔書許至
春和當從所請今已春和日俟降制伏望聖慈蚤賜
處分臣無任

又二月十三日

臣累乞休退已蒙聖慈矜許居家俟命今已累旬伏

望聖慈蚤降處分况氣候暄和舟行便於羸老臣無任

乞蚤賜付外施行

此劄子不降出十五日降麻除兩鎮致仕仍加食邑實封

文潞公文集卷第三十四

文潞公文集卷第三十五

辭免

免充禮儀使至和二年

右某蒙差人送到牒一道為迎奉太祖皇帝御容孝明皇后聖容赴開先殿奉安奉勅差某充禮儀侵伏緣某將及都門未經入觀况未授新命即預相儀是恐非便已具劄子奏乞改命大臣充使所有兄勅一道謹具送納中書

辭免公使錢治四年

臣今蚤進呈宗室公使錢文字蒙顧問體例臣因便

奏陳樞密使帶節度使不當例受公使錢去歲曾奏乞寢罷當時雖未蒙俞旨然臣必不可請受臣近移鎮永興軍又准宣接續支賜公使錢今檢到去年八月奏劄子一宗文字謹具進呈伏望聖慈許從寢罷非惟遂臣素志亦冀粗革前弊稍為後法取進止

中書劄子

熙寧二年十月

准今月三日詔中書門下二府者政事之出也維是一二朕肱之臣日謨謀于廟堂之上皆朕所尊禮之顧其識豈有重輕哉伏覩仁宗實錄天聖時二府之相猶以其職高下定位則知往者不若今制之拘也

今文彥博蓋朝廷之宗臣朕方倚以疆陲之事雖用陳升之為宰相其令升之仍位彥博下以稱朕遇賢故茲詔示想宜知悉已降詔書如前

答詔劄子

右臣伏覩今月三日詔書宰臣陳升之位臣之下者朝有着定國之彝儀苟容僭踰是紊綱紀况臣之孱薄安可克當願寢異恩庶安孤跡兼考先朝故事止因曹利用而行臣本書生粗知禮節事出姑息決不敢從伏望聖慈特賜俞可

又

臣昨日奏乞班位在陳升之下及追復十月三日詔
命未奉指揮緣今日百官起居中書密院別班入殿
即無妨碍自來日後赴常朝中書密院同班入殿若
未得請即難以入班臣須至家居俟命伏望聖慈俯
從愚懇蚤降俞旨取進止

今日進呈文字畢欲再懇請又已日肝不敢留
身

御批五月

卿兩朝舊德顧命元勳位右升之禮體甚順其勿過
為謙抑久鬱朕待卿之志兼已降詔旨來日不可下

入視事也

答詔劄子六月十日

右伏蒙聖慈特賜手詔以臣累奏乞位在升之下及
追復十月三日詔命未被俞旨亟頒宸翰誤獎臣以
勲德令勿過為謙抑臣以謂忝備近司當守法度朝
班之制不可僭踰蓋聖慈曲有褒優在愚臣固非謙
抑况茲禮例之起自於利用之初臣實畏之豈可當
也必冀曲軫天慈俯從人欲詔旨令來日不可不入
視事臣今日即未敢隨班入殿已依稟入本院視事
聽候俞旨

手詔

省所奏伏覩詔書宰臣陳升之位在臣之下者願寢異恩庶安孤跡事具悉卿翼亮三朝周旋二府國之耆雋望實素隆升之任用尚新甫登宰席原其雅意必欲推先是用斟酌禮文裁其宜稱發於朕志奚取常規蓋以褒異老成豈與利用為比卿謙恭久著於此何嫌往安乃居毋逆朕命所乞宜不允付某

答詔劄子

臣累具奏乞追寢十月三日詔命及乞依儀制立班在宰臣陳升之下至今未蒙俞旨臣欲何候陳升之

正謝畢再具陳乞又檢詳儀制使相在親王之下宰臣在親王之上將來合班尤所不便伏望聖慈詳臣累奏班在升之下正朝廷素定之儀安愚臣所守之分區區之誠必其從可候勅旨

手詔
十月十日

省所劄子奏臣累具奏乞追寢十月三日詔命及乞依儀制立班在宰臣陳升之下事具悉卿往事仁朝再為上宰予嘉舊德進服通聯而固執謙撝屢形論請謂祖宗之故雖嘗以宮使而等差而朝廷之儀亦已下詔書而著定懇懇辭避至于再三勉從所請不

志嘉歎所乞宜允付某

中書劄子

九月十日

准今月十九日詔書中書門下朕惟國朝之制雖兵
民分于二府然其委用者皆所謂執政之臣豈獨相
樞密者以為使相邪朕嘗惑之故丙申之詔令文彦
博班陳升之之上所以尊老成而均政體也今彦博
數言於武臣之例非可同於親王之班有未便執謙
慮損情有莫回予思罔然雖拒勿得其令中書門下
如所請施行故茲詔示想宜知悉已降詔書如前

乞免移判永興軍

熙寧六年七月

臣近蒙特降中使賜臣移判永興軍勅牒仍傳宣旨
以閔中久旱慮人心不安令臣往彼安撫一道臣內
省衰拙何以克當臣以謂朝廷嚴戒邊臣不得貪功
輕舉致有引惹若邊鄙別無事宜人情自然安帖以
至方田助役團結保甲皆非目下交切之務且令權
住及罷提舉常平之官一切委之提轉務從寬簡以
絕搔撓則閔輔之民不止安帖亦可小康如此即吳
中復自可安撫閔中不須愚臣誤有委付伏望聖明
詳察取進止

再乞免移判永興軍

右臣近瀝懇誠乞免移判永興軍事伏蒙聖恩特賜
詔書敦論不允所乞伏念臣以齒髮衰遲久當重務
聖慈矜憫方許均勞假以近藩寔寬衰拙今才赴任
三城尋便就移京兆况闕輔之重誠非衰老可當伏
望聖慈必賜矜察慎選才德付以分陝聽臣却赴河
陽之任臣無任

免兩鎮第一劄子

臣得進奏官報二十六日降麻制除臣兩鎮節度使
聞命若驚不皇啓處臣以愚薄遭逢聖明祿厚位高
日虞危溢陛下曲念舊物恩禮過隆苟義有未安則

禮當固避切有本朝以來名器至慎兩鎮之重親王
方授雙鉞之貴庶官不除臣豈敢貪天之功越本朝
之制醜顏不顧冒寵以居匪惟於臣難勝寔乃為國
惜法伏望聖慈特寢殊恩以全舊典令臣安分庶免
責言臣無任

兩鎮之重非庶官所授頃年韓琦罷相曾授兩
鎮亦不敢當伏望聖慈矜察即賜寢罷

第二劄子

臣近親進奏官報制除臣兩鎮節度使臣即已具表
并劄子以臣之愚薄及於理必不可冒授乞賜寢罷

未蒙俞可臣伏念上荷聖恩過有侵獎臣今不敢全
違恩旨乞祇授所加食邑實封即於老臣得安愚分
臣無任激切俟命之至

臣於前奏已具陳還兩鎮之重非臣庶可侵况
韓琦已不敢當今臣決不可授伏望聖慈矜察
仍乞貼麻處分

第三劄子

臣於今月十一日再具劄子布露誠懇以兩鎮之命
主優至重愚臣決不敢當盖恐自臣遂成體例臣亦
體聖意不敢全違恩旨祇乞授食邑實封兼鎮乞

從寢罷伏望聖慈俯從所請臣無任

文潞公文集卷第三十六

辭免

免節使請受曆頭

元豐七年

臣昨於去年十二月二十七日奉制命依舊開府儀同三司河東節度侯守大師致仕近准西京留府准尚書戶部符依元豐祿令出給到節使請料錢曆頭伏念臣遭逢朝廷久更重仕祿賜優厚叨竊固久本遂致仕尚以節使優賜實難當克欲望聖慈特賜指揮止用舊令以本官請受支給庶安愚令取進止

繳納文旁

臣昨准河南府給到致仕請俸曆頭一道却開坐見
任使相則例并給到一月請受俸錢旁一紙臣必請
所司錯誤不敢請領亦曾審問所司堅稱新條當然
臣即時遂具奏陳以謂休致老臣不敢冒請厚祿乞
依舊制致仕官請受自後本府被省符勘會往復遷
延亦已半年今准河南府別給到依舊制致仕請受
曆一道已令勾當人請領其前來出給到文旁却令
繳納訖謹具奏聞

辭免男恩命

元祐元年八月

臣近蒙聖慈除臣男貽慶司封員外郎男居中克宗

正寺主簿仰荷天恩不勝感戴緣臣男貽慶自省郎
乞白波輦運到任方及半年男居中係臣陳乞西京
勾院皆以便於私計兼輦運司職事自可往來兩京
時得省觀所有上件告命不敢祇受已具奏乞寢罷
未奉俞旨謹再錄奏聞伏乞蚤降指揮取進止

臣男勾當西京勾院居中以臣亡父某此月二
十三日私忌每歲就齋祭兼所給假滿今已先
次令發回本任臣於西京有居宅家廟歲時須
要人照管貽慶等因官兼遂私便才候臣一向
平復並令回本任

又
臣近准尚書省劄子奉聖旨以臣乞免臣男貽慶與
理轉運判官資遂及男居中授宗正寺主簿不許辭
免尋再具劄子陳奏以貽慶近蒙聖恩賜金紫章服
今又特升資序恩命稠疊固不可當及授居中宗正
寺簿於臣私計不便並乞寢罷今再准尚書省劄子
奉聖旨依前降指揮不許辭免伏緣居中見任西京
勾院臣先以恩例陳乞切念臣家廟在彼今來若得
居中守任彼中就便主辦歲時享祀誠為私幸兼臣
即目見有兒孫四人守官在京於老臣左右不缺奉

養其貽慶理任資序於義固不敢當所授居中宗正
主簿於臣私計實為未便伏望聖慈察臣懇切許遂
私志干冒天威不任戰越之至取進止

又

臣近准御批臣所奏劄子為乞免臣男貽慶居中所
授司封員外郎及宗正寺主簿已依所乞今却准尚
書都省劄子奉聖旨臣男貽慶與理轉運判官資序
居中不許辭免切緣貽慶本令隨侍臣至闕下入殿
日給伏蒙聖恩賜金紫章服無功賜服義不可當累
辭不從龜勉祇授今既許免郎官却歸本任又更蒙

特陞資序到任未久升陟無名必致人言俞不敢當
乞賜寢罷所有居中先乞西京勾院本為便於家廟
歲時主辦享祀今若授宗正主簿即於家私甚為失
所今日假滿已今發歸本任伏望天慈下從人欲臣
不任

臣位居師保任處台司當以廉退表率周行豈
敢冒竊過恩以致人言伏望聖慈矜察所有貽
慶居中所授恩命必不敢當

又

臣近再具劄子陳免臣男貽慶與理轉運判官資序

男居中授宗正寺主簿蒙封還臣所上劄子准御寶
批居中以降指揮罷宗正寺主簿依舊西京勾院所
有貽慶依前降指揮不許辭免今來居中遂免宗正
主簿上感聖恩特賜從欲所有貽慶以近蒙恩賜金
紫章服今又特陞資序實以恩命相重於義固不敢
受苟或冒竊必速人言是以不避斧鉞之誅再三干
冒天聽伏望聖慈察臣懇切特許寢罷此乃聖恩保
全老臣晚節取進止

又

臣近累具劄子陳免臣男貽慶與理轉運判官資序

及今月二十八日簾前面整懇誠決不敢當今尚未
蒙俞可伏望天慈蚤降指揮寢罷無任虔切之至
若臣男到官日久自有勞效朝廷法當酬賞即
不敢辭

免明堂禮畢賜物

元祐元年九月

臣據本家指使報准諸司糧料院告示以臣近遇明
堂禮畢依宰臣例支賜銀緡衣帶鞍馬切緣臣久病
家居不獲陪祠赴宿衛所有上件支賜義難虛授伏
望聖慈特賜指揮寢罷取進止

又

臣近具劄子陳免明堂禮畢依宰臣例支賜銀緡衣
帶鞍馬准尚書省劄子奉聖旨不許辭免臣昨以久
疾家居既不獲陪祠宿衛復叨恩賜實難虛受於義
決不敢當伏望聖慈特賜指揮寢罷庶安愚分取進
止

又

臣近以明堂禮畢蒙恩依宰臣例支賜累具劄子陳
免及今月二十八日簾前面陳誠懇今尚未蒙俞可
於義決難虛受伏望聖慈早賜指揮寢罷無任虔切
之至

又

臣近累具劄子及薦前面陳誠懇辭免明堂禮畢依
宰臣例支賜累奉聖旨依已降指揮不許辭免臣今
不敢屢違恩旨若全受即傷廉半給即有例臣久以
使相守藩在外雖不陪祠宿衛亦蒙依宰臣例給賜
一半臣今已令管請受給使人只依任使相比宰臣
例請受一半餘乞回納左藏庫伏望聖慈聽可取進
止

又

臣近蒙聖恩以臣男貽慶陞理轉運判官資序及明

堂大享臣在病假不獲陪祠宿衛依例錫賜臣累具
懇辭終未蒙開可臣忝公輔自稍知廉耻以表率縉
紳今若不顧義理貪冒恩賞寧免人言之責必貽福
過之災所有臣男陞資懇祈寢罷并臣經大禮支賜
只乞依例給半臣不憚再三之瀆邸祈天監察其誠
懇必賜矜從臣無任

臣以前件恩賜決知非宜必望聖慈從其所請
乃所以保全老臣晚節

免賜銀合

元祐三年九月

臣昨日奏劄子辭免御封所賜銀合今蒙批降聖旨

不許辭免臣伏恩忝冒實難當授容臣俟筭對日口
陳所以不可虛授之理伏望聖慈察其誠懇必賜追
寢謹奏

免差人內都知管勾葬事

元祐四年正月

臣以毒王氏身亡伏蒙聖恩持差勾當御藥院老宗
元傳宣宣問仍傳聖旨已差入內都知管勾葬事恩
眷隆厚必不敢當伏望聖慈特賜寢罷取進止

免致仕奏薦恩澤

元祐五年五月

臣伏蒙聖恩以致仕依條與五人恩澤外更時與一
召官伏念臣向者蒙聖慈過聽起於休退俾添國論

無補毫分昏耗疲癯累章得請復還故棲天幸已甚
更蒙推恩固難當克臣有堂姪曾孫常去年明堂大
禮後曾奏乞恩澤以雖是本族同居之親為服紀已
絕尋別奏常之親叔安雅得假承務即授命數月未
曾出官而身亡臣念其本房孤遺並未有得官者今
祇乞特授常一近下名目外其餘恩澤決不敢當蓋
臣前時致仕已得恩澤於義固不可再授恩澤伏望
聖慈從其誠請取進止

臣伏蒙聖恩以臣致仕依條與五人恩澤外更特與

一名官臣即劄子奏陳以臣前曾致仕已得依例恩澤今來於義不當再授更不敢陳乞止有堂姪曾孫常一名去年明堂大禮曾用例奏乞以以服紀已絕尋別奏常之親叔安雅得假承務郎不幸纔授命數月身亡臣念其本房孤遺並無食祿者只乞時授常一近下名目外其恩澤決不敢當伏蒙聖慈不許辭免伏念臣寵祿過分私門蒙恩已多無補朝廷久自愧負豈可更茲僥倖義實未安必難當免伏望聖慈特賜允臣所請取進止

謝賜銀

元祐五年四月

臣伏蒙聖恩特賜銀五千兩即其劄子辭免不敢當克尋奉御批不許辭免又蒙特降中使宣諭不允臣不敢再三上瀆聖聽已祇受訖臣無任

再辭致仕恩澤

臣近准尚書省劄子奉聖旨文集致仕依條與五人恩澤外特與一名官尋兩具奏陳臣前後蒙恩澤已多不敢克當臣有同居堂姪曾孫常一名昨遇明堂大禮奏乞推恩為服已盡碍新條不行別具陳乞常親叔安雅授假承務郎被恩之後不數月未經叅選身亡臣以常見今孤遺房下並無食祿者止乞授常

一近下名目外餘乞寢罷今再准尚書省劄子奉聖
旨文常特與假承務郎餘依前降指揮者臣無任感
恩荷載之至所有臣今來致仕依條合得五人恩澤
累具辭免難以祇受更不敢陳乞上件恩澤謹具奏

文潞公文集卷第二十六

文潞公文集卷第三十七
辭免

免賜公使錢

元祐五年六月

臣准尚書省劄子三省同奉聖旨文某特依前任宰
相支破添賜公使錢仍令河南府管勾支用者恭惟
聖恩眷念老臣極為優異荷戴之深如負山嶽然自
來前宰相知判州府則有犒設軍兵延待賓客以其
本任不足故有添賜之名今臣以疲老蒙聖恩從請
得遂休致閑居西洛則無延容犒軍之理若授添賜
極是無名臣必不敢祇授伏望聖慈許從寢罷

又
臣近蒙聖恩特依前任宰相例支破添賜公使錢臣
以致仕退居里閭受賜無名乞行寢罷今准尚書省
劄子奉聖旨不許辭免者然臣依蒙聖慈矜憫羸老
得遂退閑優賜無名不可冒受伏望聖慈必賜俞允

河南有申狀

西京留府右都廳准元祐五年六月四日尚書省劄
子文某劄子奏近蒙聖恩特依前任宰相例支破添
賜分使錢臣以致仕退居里閭受賜無名乞行寢罷
今准尚書省劄子奉聖旨不許辭免者然臣伏蒙聖

慈矜憫羸老得遂退閑優賜無名不可冒授伏望聖
慈必賜俞可謹奏六月四日三省同奉聖旨令河南
府將所賜公使錢附本府公使庫收管應緣文某合
用公使錢依例支用右劄河南府者右本府已帖公
使庫照會去訖

又辭免公使錢

臣伏蒙聖恩依前宰相例支破添賜公使錢恭惟聖
慈垂軫老臣至為優異然臣以受之無名又無前例
即所賜自臣為始更啓後人之例殊不自安累奏乞
行寢罷今又准河南府公文奉聖旨今河南府將所

賜文某公使錢附本府公使庫收管應緣文某合府
公使錢依例支用者臣既遂休致即無合用公使授
受之間誠不為便况臣閑居逸老脩然自適乃聖恩
所賜餘年恩禮至厚又菽水不欲累於公私創開此
例致後人攀投伏望聖慈必賜寢罷

進獎諭劄子

臣向以使侍中充樞密使到院後每歲依例文公使
錢三分之一歲合支錢三千三百餘貫臣謂雖有舊
例既無犒設所用終是無名竟不敢請累章還納蒙
先帝從允賜詔獎諭今具錄進呈

許免公使錢詔

元祐五年

據某省中書准樞密院劄子奏卿因進呈宗室公使
錢文字樞密使帶節使不當例受公使錢今檢去年
八月臣所奏劄子上進伏望許從寢罷事朕日財萬
幾晨訪近輔而卿因錄先朝之奏草載辭舊府之公
錢乃謂在外則有犒軍之常在內則無享賓僚之事
傾敢受於私意願悉還於縣官朕惟德盛者必約諸
身計遠者必體於國故曾子輕楚人之富何慊義之
所在汾陽佐潘市之求衆謂忠之尤至勉從嘉舉重
集褒懷所請已從故茲詔示想宜知悉

先詔

勅省所劄子奏辭免依前宰相例支破添賜公使錢
事具悉卿舊德元老弼亮四世勤勞帝室厥功茂焉
朕諮謀始初復起自洛雍容大政亦粵四年惓惓告
歸誠請莫奪朝廷推尊禮之意有司賦公養之錢而
屢剡忱辭重開後比惟授受之恤有廉高之風脩然
燕居顧無塵累靜言審計義不忍違博史善猷勿殊
內外永綏眉壽朕有賴焉所請宜允

答詔劄子

臣伏蒙聖慈依臣所奏辭免文錫公使錢者厚賜無
名因當避免大君有命得遂先從仍降詔音過獎捧
承至重榮幸萬深臣無任

辭免男恩命

臣據西京進奏官李平狀申臣男貽慶除兵部郎中
臣男及除集賢殿修撰聞命之初不遑啓處緣臣男
各以解官持母服將欲服滿遽蒙朝廷特此優異除
授退量忝竊寔難當克俟四月從吉各令赴闕躬自
陳免謹先具奏聞

又

臣於三月三十日伏覩進奏官李平狀申蒙朝恩持

授臣男及集賢殿修撰臣以思出望外難以當克即
特具劄子奏免至今未蒙從允今月十一日蒙朝廷
降到誥命必不敢承受兼臣男及亦自具狀陳免所
有告身已送河南府收掌伏望聖慈早賜從允伏候
進止

又

右某近蒙聖恩特授臣男某集賢殿修撰尋具劄子
陳免伏蒙特賜詔書不允者臣竊以恩命過忝懼不
敢當累具懇辭未蒙矜允恭承詔諭益重戰兢伏望
聖慈俯從愚誠特賜寢罷兼臣男及亦再具狀陳免

次

又

臣近累具陳免聖恩除授臣男及集賢殿修撰恩命
事伏蒙再詔書不允者切念臣向者起自退休再叨
重任充位累歲訖無少補幸繫全度再遂謝歸慙負
厚恩自知無以塞責至於所得奏薦恩例皆不敢當
即蒙矜許今乃以臣謝事無爵可加而使臣男及叙
進職名復此忝冒實難祇受兼臣男已累具辭免伏
望聖慈深察至誠早賜寢罷取進止

又

臣男及持母服初除得遂西臺開局以便養親極為
優幸更蒙進職事出無名必不敢當伏望聖慈追寢
進職之命必期得請

又

臣近累具狀陳免臣男及加集賢殿修撰恩命三奉
詔書不許辭免屢煩訓諭恐懼不惶然義有未安不
可輒已緣臣去歲獲解重任再遂退休自以居位無
補不敢更當自得恩例□嘗懇辭皆獲俞允今者臣
男及叙遷撰職復以臣致政無爵可加為右寔非臣
之素願所以不避冒瀆再三必祈寢罷伏望聖慈察

臣懇款特賜矜從

又

臣男及所進職名決不敢祗受若臣男服之後任以
繁難年歲之間稍有積效朝廷過推恩典謂之疇庸
猶可恭授今即不然伏望聖慈特寢前命俾安愚分
庶息人言臣無任瞻天俟命惶懼之至

又元祐五年
十一月

臣伏覩告命除臣男及集賢殿修撰知河陽者聖恩
深厚感戴不勝切緣臣男已蒙假守藩郡私計便安
極為僥倖不敢辭避所有加職之命不緣績効忝冒

過優實難祇受他日若因繁難任使稍著勞效焉敢
固辭伏望聖慈特許寢罷取進止

臣男及已有奏狀辭免所加書殿之職伏望聖
慈從允

又

臣以衰老致政居洛有子孫五人蒙朝廷優假並得
西京差遣令便侍養臣以謂尸祿者過多遂及臣第
七男及便近州郡俾之宣勞以報厚祿今蒙聖慈差
知河陽并再除集賢殿修撰得郡既便加職難當尋
奏乞辭免所加職名伏望聖慈未賜俞允臣以為因

自乞郡仍加職名在於私誠實難當克伏望聖慈鑒
其懇切許罷職名臣無任惶恐俟命之至

又

右臣近具劄子奏免臣男及所加集賢殿修撰職名
伏奉詔書不允者老臣無狀久忝厚恩愚子何知繼
叨寵命既難虛授須至固辭伏蒙聖恩特降詔旨曲
加敦諭未賜俞從仰戴聖慈不任感荷惶恐之至謹
具奏謝

臣男所加職名已別具劄子奏乞許賜寢罷

又

右臣以父子遭逢朝廷擢用寵踰涯分理合再辭伏
蒙眷降詔書未從所欲仰荷聖眷俯激愚衷臣無任
惶悚之至

又
臣向以休致居洛子孫五人並除洛中差遣臣以尸
祿者過多不遑啓處遂乞第七男及補郡自試尋蒙
恩差知河陽并再除集賢殿修撰得郡已便加職難
當尋再乞辭免職名疊蒙賜詔不允在臣子孫之分
尤不遑安伏望聖慈許罷職名必若年歲之間治郡
稍有成績或委繁難驅使朝廷因而推恩敢不祗受

臣無任懇切之至取進止

賜馬詔書

元祐六年七月

勅某省熙河蘭岷路奏據溫溪心差蕃部青宜除囉
阿角四以蕃書詣范育欲以騾驢驢馬一疋送與卿
事惟我宗臣名震夷落狼心駛舌知獻厥誠朕以張
叟拒羗之獻不如旅獒昭德之致已敕邊吏答賜所
直其馬今以賜卿至可領也故茲詔示想宜知悉

奏狀

右臣伏准今日三日蒙賜詔書以熙河蘭岷路奏據
溫溪心差蕃部青宜除囉阿角四以蕃書詣范育欲

以騶驥驪馬一疋送與卿事已勅邊吏答賜所直其
馬今以賜卿臣勘會舊例邊帥在任蕃首或有獻馬
並以官物優答其直其馬納官臣今蒙聖恩以馬賜
臣實恐有異故常特啓新例臣決不可受伏望聖慈
特賜寢罷已行之命謹具奏聞

賜到答詔

勅某省所奏伏蒙詔書溫溪心欲以馬一疋送與卿
以勅邊吏答賜所直其馬今以賜卿臣恐有異故常
特啓新例伏望特寢已行之命事具悉種羗獻誠屬
我大老雖異康侯蕃庶晝日三接以彰裴度勲德名

聞四夷茲豈故常矣煩謙避所請直不允
熙
河蘭岷路經略安撫使司公文准元祐六年七月二
日樞密院劄子熙河蘭岷路經略司奏據溫溪心差
蕃部青宜賒羅阿角四賚到蕃字稱溫溪心文字上
告熙州經畧使范龍圖東京有箇文相公自家如今
獻送騶驥驪馬一疋告龍圖好生照管將馬疾早送
與文相公去下本司看驗得係騶驥驪大九歲已送
蕃部司餵養伏乞朝廷詳酌指揮候勅旨三省樞密
院同奉聖旨今范育依例估價以物作朝廷指揮回
答仍脩寫蕃字送溫溪心馬以准朝廷指揮差人押

管送與文相公去也所有馬仍令學士院降詔賜與
文某令劉付權發遣熙河蘭岷路經畧使直龍圖范
朝奉指揮差人押送太師交割准此右勘會本司近
差管勾河州西原堡左班殿直李震管押拂林國般
次赴闕已帖李震因便管押上件馬一疋赴致政太
師衙送納去訖伏乞照會收管

奏狀

臣以西蕃溫溪心送馬一疋與臣蒙朝廷支賜馬價
與溪心及蒙降詔賜馬與臣今熙河經畧司報知溪
心臣以事異故常不敢受賜奏乞將馬納官蒙再降
詔書不允臣今以事小不敢頻有煩瀆依詔命祇受
已別具表謝次

文潞公文集卷第三十八

舉官

舉李繼皇祐二年

臣昨准例奏乞國子監直講李繼改官簽署許州判官公事准中書劄子奉聖旨李繼與權忠武軍掌書記候一年與改京官者臣於李繼本非素舊采於衆議謂有文行曾應制舉久為學官輒露奏章乞除幕職於臣竊知人之美為國有育材之漸今繼自太學講官權授外郡掌記誠似屈其資望切慮繼以學職更例更須二年改官或聞自例自學官奏辟皆得改

授合入京官兼近歲陳執中奏辟鞠真卿先陳州通判亦以校年限未滿特授集賢校理伏望聖慈以繼在太學歲久文行為衆所稱特賜改轉合入京官簽書許州判官公事如改轉後本官犯正入已贓臣甘同罪取進止

舉陳湜

臣奉勅差充永興軍一路都部署安撫使切見太常博士陳湜久在河東陝西差遣深曉邊事軍政欲乞差本官管勾永興軍一路都部署安撫使司機宜文字只理本官令人差遣資序右取進止

舉馮誥任允孚

臣奉勅差充永興軍一路都部署兼置制秦鳳路軍馬司公事緣秦鳳日近頻有番界事宜須籍經諳本處事體方幹官吏逐急差使一臣切見屯田郎中馮誥曾任秦鳳路都監及通判秦州首尾六年並准朝廷指揮令管勾蕃部公事深諳秦州東西路番情邊事本官見合入知州差遣臣欲乞差充秦鳳路置制勾當公事兼不妨本官待闕差遣亦無僥倖只候公邊置制稍有倫序却令發赴本任一臣切見太常博士任允孚自慶曆三年差管勾秦鳳路經略司機宜

文字及通判秦州至去方年替在彼十年深諳事體
臣今欲乞差本官管勾秦鳳路置制司機宜文字右
取進止

舉邵叔元

臣切見三班奉職李昌來臣處公叅云奉宣差權秦
州伏羌寨監押切緣伏羌是秦州西路最大城寨控
三都谷文羸開兩路自來屯兵之處及體當西路事
宜全籍得力寨主監押兼向來多近上或帶職班行
充寨王今米寨主是殿直謝育又差李昌權監押恐
不能彈壓番漢公事臣勘會秦州三陽寨押監殿直

邵叔元在秦州差遣十餘年深諳彼處番情邊事兼
有心力欲乞就差邵叔元充伏羌寨監押勘會東路
治坊寨監押已及二年却乞差李昌權治坊監押取
進止

舉曹弼

臣切見秦州隴城寨監押侍禁曹弼好人材有膽勇
方略在秦州差遣首尾十年深諳邊情今欲滿替勘
會秦州寧遠寨在西路極邊兼寨主尹寶臣自到任
三年有餘欲乞就差曹弼充寧遠寨主取進止

舉張度

臣切見自來節度使赴任例奏薦得門客一名今有
大學進士張度孤寒有文行曾經省誠下第在臣門
館多年况近制奏薦門客更不理選出官張欲乞待
賜一試銜名目取進止

舉孟辨

臣切見提舉北京金新堤職方員外郎孟辨文學中
第廉幹在公恬於進趨確然有守加以素負才武頗
懷忠義曾有臣知其所能舉換右職伏望聖慈許召
赴闕量其人材特賜擢用

舉楊宗禮

臣切見右驎副使楊宗禮頃自廣南知州安撫却
監因言馬政先朝特召為郡牧都監到任已及三年
備見勤幹兼勅譬畫右天廐坊充孳生馬監漸有倫
叙欲乞留宗禮再任藉其經度庶有成效取進止

舉錢長卿

臣等奉聖旨選舉官兩員與王存顧臨編修經武要
略刪定諸房例冊及令本院都副承旨提舉臣等切
見著作佐郎錢長卿大理寺丞劉奉世各有學術勤
於編綴欲乞差充本院編修經武要略刪定諸房例
冊官取進止

舉李端卿等

臣切見權河北監使周華近丁憂去職本路馬政方有倫理切要素知牧事之官相繼整齊切見郡牧判官李端卿累經本司任使詳知坊監利害兼資序已深乞差免河北監牧使兼覩都官員外郎都水監丞張疇處事精敏乞差權監牧判官如逐官向去職事曠取臣甘妄舉之坐取進止

近知李端卿以家貧累重累乞外任都水監內外丞額外負數甚多必可減那此一員

舉劉庠

熙寧六年六月

臣切見龍圖閣直學士知太原府劉庠向為諫官屢陳讜議累經外任咸有美稱今領太原一道緝治兵防拊緩夷夏紀綱振舉人情悅服臣雖遙領河東與庠義切聯事知其善狀理合薦論伏望聖慈特與不次升擢仍令再任新貴方面得人朝廷增重取進止

舉范純仁

同年上月

臣切見工部郎中直集賢院知和州范純仁名臣之後世能其家忠義不回輩流推服伏望聖慈召還禁近以備訪問必有正議仰禪聖政取進止

舉王大方

同年上月

臣切見供備庫副使安肅軍駐泊都監王大方勲臣
之後敏於從事累經繁使悉有美稱臣今保舉堪充
升擢任使

舉徐保伸同年上月

臣切見供備庫副使徐保伸累更邊任熟曉兵政廉
良謹厚不憚勤劇見任江南東路駐泊兵馬都監將
欲任滿伏望聖慈就差充河陽兵馬鈐轄替王臨滿
闕

舉呂公懋同年上月

臣切見都官負外郎呂公懋秉心堅正蒞事精敏勤

職安分衆謂滯淹伏望聖慈特賜不次升擢任使

舉蘇液同年上月

臣切見著作佐郎蘇液才次雋敏性質剛果昨在樞
府供職尋以臺章去官衆謂非辜事亦尋白伏望聖
慈特賜陞擢任使

舉張利一熙寧六年六月

臣切見皇城使達州刺史衛州鈐轄張利一久更邊
任深曉事機求之輩流不可多得昨在雄州以不約
束屬吏致引惹生事原情實非已事然而料度虜情
應答邊機皆有倫理故北人頗憚而愛之今除為散

官內遷閑職北虜頗得其計邊人深惜其去伏望聖
慈體察早賜牽復知邊要州軍取進止

舉李師錫熙寧七年五月

臣切見河陽通判李師錫才資樸茂屢事幹勤前為
陝西轉運判官深曉鹽馬之法切聞以議論寡合託
以慢公非時差替近又以前任按察之誤與轉運使
一例降官原情頗輕降奪差重伏望聖慈體察早賜
牽復取進止

舉蘇轍熙寧六年六月

臣今復蒙聖慈從欲均逸便藩當求時才助宣邦教

切見權留守推官蘇轍博通經術深知治體見任陳
州州學教授如臣所舉不如狀及犯正入已賊甘當
同罪取進止

官
兼河陽累有前例奏差學官近向經奏留教授
陳安民再任自後奏充國學直講本州見今闕

舉高惟幾慶曆六年

臣切見益州路提點刑獄高惟幾材幹明敏長於治
繁臣頃任河東節轉運使惟幾通判麟州用兵之際
供意百端悉能應辦昨任益州路轉運判官日適值

歲飢臣在益州首先勸誘人戶發粟賑濟遂請高惟
幾出巡外郡勸誘人戶出粟一如益州之法甚濟飢
民續狀可獎其高惟幾伏乞朝廷特賜陞擢任使以
勸勞吏如經擢用後本官犯正入已贓臣甘同罪取
進止

文潞公文集卷第三十八

文潞公文集卷第三十九
舉官
舉楊文舉

臣切見利州路提點刑獄楊文舉屬勤幹敏前年利
州路大飢臣累牒本官體量救濟備見用心集事以
致流民不致重困伏望朝廷特賜陞陟任使如
經擢用後犯正入已贓臣甘同罪取進止

舉田瑜

臣切見益州路轉運使田瑜才識通敏自到本路歲
月久未而辦集財賦使張弊原皆有倫理今臣保舉

堪充陞陟任使如經擢用後犯正入已贓臣甘同罪
取進止

舉李九言

臣切見太常博士李九言明經登第學術精深施行
為政動有規法前任益州通判益州適值歉歲與臣
協力賑濟飢民備見績効今已得替到闕切緣益州
通判得替舊例皆有陞陟差使近因臣僚爭授益通
判遂停舊例止得循資而九言之職勞未錄首為新
制所限伏乞朝廷體察特賜陞陟任使或悉其學術
任以檢討之職如經擢用後犯正入已贓或舉不如

狀臣甘連坐取進止

舉張揆等

准勅節文令臣限一月內舉官三員於通判內
舉成資以上一員充知州者

臣切見秘書郎通判未與軍張揆文學政事輩流所
推兼兩任陝西通判並有聲稱臣今保舉堪充知州
張揆不是見任中書樞密院及臣之親戚兼歷任中
並無贓濫及私罪情理重者如經朝廷擢用後若贓
汗不理苛刻害民臣甘當同罪謹具狀奏聞
臣切見太子中允知分州平遙縣陳湜文行純懿政

事詳敏臣今保舉堪充通判其湜不是見任中書樞
密院及臣之親戚歷任中並無贓濫及私罪情理重
者如經擢後若贓汙不理苛刻害民臣甘當同罪謹
具狀奏聞

臣切見秀州軍事判官鄧申稟性公直蒞官幹廉臣
保舉堪充京官知縣其鄧申不是見任中書樞密院
及臣之親戚歷任中並無贓濫及私罪重者如經擢
用後若贓汙不理苛刻害民臣甘當同罪謹具奏聞

舉蓋平等

臣近准勅保舉通判永興軍張揆克知州今准

任使如所舉不如今狀臣甘謬妄之坐

臣士舉姚復治平二年

臣切見大理寺丞姚復學政精勤臨事幹敏士檢端
慤為衆所知臣面奏充掌機宜文字備見其能伏望
聖慈特賜召試出身如經擢用後所舉不如今狀甘謬
妄之坐

舉楊遂治平二年

臣切見絳州團練使楊遂出於行陣累有戰功歷軍
廂主落權涇原州總管及沿邊都巡檢使頗有績效
兼年齒方壯臣今保舉堪充管軍及邊上重難任使

如蒙朝廷擢用後亦如所舉臣甘連坐取進止

舉張揆治平二年四月

臣切見龍圖閣直學士張揆議論堅正器識周通先

朝侍讀學士揆之弟學優博有兄之風臣今保舉堪

充經筵之職如所舉不如狀臣甘誑妄之坐取進止

舉劉航同年月

臣切見屯田郎中白波都大提舉輦運劉航駕部員

外郎提舉在京倉草場李希逸知永州沌部員外郎

趙士宏並才術優長臨事精敏臣今保舉各堪允陞

擢繁難任使如所舉不如狀甘當同罪取進止

臣去年夏奉制判永興軍奏辟河南府伊闕縣主簿

魏沂就若充京兆府學教授未到任間臣被召赴闕

沂已經流內銓投狀情願更不赴任在銓祇候注官

勘會沂自嘉祐八年登進士第初任河南府伊闕縣

主簿方十箇月以臣奏舉罷官不成考第近知改註

真定府戶曹參軍猶待遠闕伏緣本人久預太學生

員衆所推其學業臣今保舉伏乞朝廷改注沂西京

或南京國子教授差遣免致久罷官守妨廢資考足

以推廣學業訓勵生員

以推廣學業訓勵生員

舉任逸年正月

臣切見都官外郎通判鄧州任逸賦性明敏臨事精詳臣今保舉本官堪充陞陟繁難任使如擢用後犯正入已贓及不如舉狀臣甘當同罪伏候進止

舉賈青

臣勘會本路安撫司所管棣州素號劇郡萬有第十大將官在彼駐劄近聞知州虞部郎中張昌期奏乞官觀差遣今切見通判大名府庫部員外郎賈青久歷事任才用周敏伏乞朝廷就移青知棣州所貴繁劇得人如朝廷擢用後不如舉狀乞犯入已贓臣甘

同罪取進止

又

臣近奏舉通判大名府庫部員外郎賈青知棣州今聞朝廷以別差下人臣勘會博州知州王休復到任已及二年以上緣本州係居黃河地分合係舉官去處兼所管就糧諸軍不少全籍得人臣切見賈青久歷事任才用周敏伏乞朝廷就差賈青知博州候王休復任滿目交割勾當所貴繁劇得人如蒙朝廷擢任後不如舉狀及犯入已贓臣甘同罪取進止

舉范祖禹元豐二年二月

臣切見奉議郎編修資治通鑑范祖禹文行操守為
衆所推臣曾論薦堪文館任用臣以謂古之用人必
因其器能如祖禹之才實堪文館任用伏乞檢臣前
奏特賜任使取進止

舉富紹庭

阮祐元年十月十日

臣切以故相富弼直道逢辰昌言致主始終一節華
夷具瞻向與王安石同在中書議論趣向不合義難
共事乃請出藩遂不待年亟永致政閉居十稔不
亡歿今聞配享神宗廟庭公論極為允愜今弼之子
惟紹庭一名監中岳廟伏望聖慈以今來配享特推

恩禮於弼之子孫更賜優加錄用取進止

舉孔文仲等

元祐元年十一月十七日

臣切見朝廷近置館閣職名修復祖宗育材養士之
法詔許大臣各舉所知三人以充其選仍立法以秘
書省官任校書郎二年正字四年並除校理伏見禮
部員外郎孔文仲蚤應制舉學行純正兵部員外郎
葉祖洽熙寧初進士選首殆今一十七年學術幽深
衆所淹滯比部員外郎錢長卿詞藝精敏問學該通
先帝嘗令撰高麗書本稱旨遂蒙獎拔三人皆曾任
秘書省校書郎偶於未復館職以前就遷省即不該

新制緣逐人各在先朝已經采擢備秘府文學之任
宜在今日之選新條試職之人京官以上並除拔理
今來逐人已係省郎欲乞詳逐官資地比附各除充
館閣近上職名取進止

勛會復館職新制以前曾任秘書郎者止有此
三人今後即無人援例

文潞公文集卷第三十九

文潞公文集卷第四十
舉官

舉胡宗炎

臣向於元豐七年內曾奏舉朝散郎將作監丞胡宗
炎石臣之後詞學登科乞朝廷特賜陞擢至今未蒙
收采本人今已年滿得替向在本監累經朝廷大功
役均節材料宣力甚多備見勞能伏望聖慈特除充
省府官任使取進止

舉溫俊又元祐二年

臣切見朝請郎前監左藏庫溫俊又廉勤公幹昨監

國帑不避衆怨舉行積弊但以孤立人鮮知之伏望聖慈今三省檢其履歷特賜陞擢任使

舉宋匪躬

臣切見承議郎宋匪躬名臣之後能世其家博學多聞習知典故伏望聖慈令三省詳其家世并所履歷特除秘書校書或檢討之任

舉王欽臣

元祐元年九月二日

臣勘會太僕寺近准朝旨通領外監特司依舊郡牧司職事本寺少卿高遵惠日近丁憂只有少卿李周一員差往諸路相度見闕長貳管勾寺事切見工部

郎中王欽臣曾任郡牧判官并提舉陝西買馬又充駕部郎中練習馬政欲乞差充太僕少卿填高遵惠闕緣本人曾任陝西轉運副使兩任省郎資序已深兼其人素有文學仍乞除一館閣職名充上件職事官庶目下便有正官修復馬政取進止

又九月七日

臣近以太僕寺闕官總領內外監牧事奏乞差官填闕值累日期明堂大禮齋祠中未奉聖旨今來本寺即日闕官治事欲乞檢會臣前奏早賜處分取進止所有初二日奏劄子恐齋祠中未聖覽今更別

繳進呈

舉楚建中等

臣昨在西京蒙聖恩差勾當內東門梁惟簡賚賜臣手詔曲有諮詢臣勉竭愚慮上對仍詢及臣之所知賢才亟當論薦用副東求臣當時粗舉三人應詔以久在外藩後來新進少所知識容臣博訪續具奏陳臣今蚤延和殿進對蒙聖旨更有薦論令進入文字來今有續具在外臣僚皆是已試有効可以因其所能而任之伏乞聖明更賜采察

一王議大夫天章閣待判致仕楚建中雖年愈七

十精力強明累任重路轉運使及三司判官副使環慶真定路經略安撫使在京主判劇司皆有風績

一中散大夫直龍圖閣知滄州李之純累任運轉運使忠厚淳正頗有時譽

一河北提點刑獄唐義問中正有守恬於進趨頗有學識善議論通時務

一知秦州龍耳圖范音曾為言事官頗有學識議論不屈

一河北轉運判官杜純中正有守累以公事黜降

衆謂理直終不自明播紳多稱之
一知懷州朝散郎黃景學行敦篤有古儒士之風
可備勸講之職

右謹具奏聞謹奏

又

臣於去年六月中曾入劄子應詔續舉官六員今聞
多已施行內一員前知懷州黃景未見施行問得中
書言未見文字切慮遺墜不達輒敢錄元劄子進呈
其黃景伏望聖慈采察特賜擢用取進止
今早已曾面奏奉聖旨令別進劄子

舉杜訢等

元祐二年二月

臣伏以近者獎恬退之士抑躁競之風切見衛尉少
師杜訢賢相之後能世其家久歷省府之任素有老
成之稱太僕少卿李周恬靜有守常官不撓向為監
司以直道被黜久安閑職宣德郎楊國寶安貧守道
恬於仕途器識深遠才力有餘雖近除太常博士未
盡其才誠大學博士品太臨強學篤行有古儒士風
杜門十年以講學自樂經術通明聞譽夙著雖蒙召
真太學以親嫌未極其用以上四人伏乞特賜擢任
取進止

舉唐義問元祐二年五月

臣切聞就差河東轉運副使唐義問知荆南緣荆南帶湖北一路都兵鈐魚統押近界蠻夷地望重於湖南又聞廣西蠻人潛結荆湖西路蠻首作過極要彈壓今來唐義問只以近下散官知荆南慮事體不重兼近有謝麟自知邠州移知潭州帶直祕閣葉均以祕書少監知荆南帶直龍圖閣從來體例甚多伏乞朝廷特與檢會諸例今唐義問兼多館閣職名知荆南所貴夷夏稱呼有所增重方面事體取進止

舉張守約元祐三年五月

臣切見東上閣門使廊廡路馬步軍副總管張守約累經陝西任使熟知邊事深曉兵政但以忠勤孤直進身不苟今雖年過七十精力甚強而官止橫行使額欲望朝廷察其人材復歷特賜擢充正任以獎久勞

舉邢佐臣

臣切見在藏庫副使定州路鈐轄邢佐臣累經河北河東任使深曉邊事熟諳軍政賴以忠義自任不可求進今年過七十精力強明尚淹諸司副使伏望朝廷察其履歷人材擢充正使兼帶兵部以獎忠義

舉包綬元祐三年十月十七日

臣切見故樞密副使包極身備忠義秉節清勁直道立朝中外嚴憚先帝以其德望之重擢為輔臣未盡其才不久薨謝舉朝痛惜之今其子綬見任宣義郎簽書濠州判官能世其家恬靜自守不苟求進士人稱之臣伏見近獎用劉敦夫呂由誠皆以其父呂誨劉庠之故如包極之後惟綬一身孤立不倚臣以謂宜蒙獎擢以旌各臣之後取進止

舉張雲卿

臣切見蔡州真陽縣尉張雲卿素有學行清久自守

安貧守道未嘗苟求應進士舉晚霑一命士人惜之兼雲卿通經博古欲望特除一西京學官必能表帥諸生亦可敦薄俗取進止


舉尹復湊元祐四年

臣切見同五經出身尹復湊素有鄉行頗深儒學累有公卿薦論及蒙朝廷旌賞前歲科場本州又以經明行修薦其二人於朝廷去年復湊殿試為第七若其弟復性充第二名今又聞本路監司奏復湊乞充宣聖廟教授闕考其行實極稱其任伏望聖慈特賜依奏差充庶使闡揚鄒魯之素風欽承周孔之聖教

取進止

取進止... 丙辰陳月以養
安院藏本寫

真



文潞公文集卷第四十

